



TRÁMITE DE CONSULTAS NO PROCEDEMENTO DE AVALIACIÓN AMBIENTAL ESTRATÉXICA SIMPLIFICADA

Nome do plan: Delimitación do núcleo rural de Ribela de Abaixo
Promotor: Concello de Abadín
Órgano substantivo: Dirección Xeral de Ordenación do Territorio e Urbanismo
Expediente: 2018AAE2267
Código web: 2235/2019

O día 22.10.2018 recibíuse no rexistro desta Consellería de Medio Ambiente, Territorio e Vivenda un escrito do Concello de Abadín co que achegaba un borrador (memoria e planos) da “Delimitación do núcleo rural de Ribela de Abaixo” para iniciar a súa tramitación.

O 24.10.2018 este órgano ambiental requiriu ao promotor que presentase un documento ambiental estratéxico da dita Delimitación de núcleo rural. O 12.09.2019 recibíuse a documentación completa para poder iniciar a tramitación ambiental.

Unha vez avaliada a documentación presentada e considerando que:

- 1 A Lei 2/2016, do 10 de febreiro, do solo de Galicia (LSG) integra no procedemento de aprobación dos instrumentos de planeamento urbanístico o proceso de avaliación ambiental estratéxica previsto na Lei 21/2013, do 9 de decembro, de avaliación ambiental.
- 2 A LSG establece no artigo 78 que os municipios sen planeamento xeral poderán delimitar o solo dos núcleos rurais existentes, logo da aprobación do correspondente expediente de delimitación; no mesmo artigo describe o procedemento a seguir (desenvolvido nos artigos 190 e 191 do Regulamento da LSG).
- 3 Conforme co indicado no artigo 78.4.b) da LSG, o órgano ambiental formulará o informe ambiental estratéxico tras identificar e consultar as administracións públicas afectadas e as persoas interesadas por un prazo de dous meses; entre os órganos que haberá que consultar estará o competente en materia de urbanismo. Se ben, este órgano ambiental, co obxecto de favorecer a transparencia e a participación cidadá, decidiu estender as consultas ao público en xeral.
- 4 A Dirección Xeral de Calidade Ambiental e Cambio Climático ten atribuídas as funcións en materia de avaliación dos efectos de determinados plans e programas no ambiente, ao abeiro do disposto no Decreto 42/2019, do 28 de marzo, polo que se establece a estrutura orgánica da Consellería de Medio Ambiente, Territorio e Vivenda.

ACÓRDASE:

Someter a consulta pública na páxina web deste órgano ambiental por un **prazo de 2 meses** o documento ambiental estratéxico e o borrador da **Delimitación do núcleo rural de Ribela de Abaixo**, no concello de Abadín.

No caso de que este órgano ambiental determine que é necesario someter o planeamento ao procedemento ordinario de avaliación ambiental estratéxica, as observacións e suxestións recibidas serán tidas en conta tamén na elaboración do documento de alcance do estudo ambiental estratéxico (artigo 31.2.a da Lei 21/2013).



As observacións e suxestións poderán ser formuladas por calquera das seguintes canles:

- A través do formulario informático habilitado na web deste órgano ambiental (<https://cmatv.xunta.gal/programas-con-periodo-de-consulta-aberto>).
- A través do correo electrónico: avaliacion.ambiental.estratexica@xunta.gal
- Mediante escrito presentado na sede electrónica da Xunta de Galicia ou no rexistro administrativo da Consellería de Medio Ambiente, Territorio e Vivenda, situado en San Lázaro s/n, en Santiago de Compostela.

En calquera dos medios empregados deberá identificarse quen formula as observacións e suxestións (nome da unidade administrativa, ou nome do colectivo, ou nome e apelidos da persoa), facilitando tamén os datos de contacto.

O informe ambiental estratéxico que se formule tras o período de consultas farase público no *Diario Oficial de Galicia* e na páxina web da Consellería de Medio Ambiente, Territorio e Vivenda (https://cmatv.xunta.gal/tema/c/CMAOT_Avaliacion_ambiental)

Santiago de Compostela, 17 de setembro de 2019